

0 10 20 30 40 50 60 70 80 90 100 110 120 130 140 150 160 170 180

Inches
Centimetres
1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30

182240
847-1

Kodak Color Control Patches

從祖句山先生以大科入翰林於書無所不窺所爲詩
古文辭力能自闢畦徑然未有傳本海內推重者徒以
紫竹山房時藝耳先生嫡孫桂生官湖北安陸守襄輯
全集若干卷反覆訂證行付剞劂有日矣嵩慶自瓊州
行部歸來受而讀之其文浩浩汪洋雲譎波詭猶身在
萬石舟目眩神奪而不能以已又一海外奇絕觀也古
詩喜押強韻類韓孟體酷愛五七言小詩清曠有逸致
標格在皮陸蘇黃閒輒就私心所耆好者別爲一刻畧
仿漁洋精華錄之例刪次年譜列于卷端非敢有所決
擇亦如波斯胡入五都之市信手拈得便成奇寶卷帙

既簡取便省觀願與海內推重先生者同此賞心又以先覩爲快也刻成爲書其緣起時

嘉慶十二年正月七日廣東學使者陳嵩慶識

年譜

姪男 玉繩編次



康熙三十九年庚辰

先生生於是年十二月初六日申時名兆崙字星齋先世家餘姚七世祖諱鈞始遷錢塘豐馨里之句耳山後遂以爲號山多紫竹又名紫竹山父臯亭公諱培駿母沈太夫人先生上有女兄三大母秦太夫人望孫切禱於上天竺一夕夢神與黃金一錠中積玉粒及覺遂生先生左駢脇識者知爲異秉云

四十年辛巳

二歲

四十一年壬午

三歲方能言阜亭公從枕上口授毛詩及左氏春秋
輒能背誦每寢恍見白髮老人長可尺許持杖枕畔
嘻嘻作撫翼狀先生習見之不為怪亦絕不與人言
至成人始無所見是歲閏六月八日仲弟眉山公生
初名兆崑後更名兆嶠號聞風著有眉山詩鈔

四十二年癸未

四歲

四十三年甲申

五歲十一月十五日季弟支山公生即玉繩父也諱

兆岐

四十四年乙酉

六歲秦太夫人鍾愛特甚常攜侍左右隨寢食分甘
恆倍諸姊弟先生輒泣旁人誤會意又附益之則愈
泣大母廉知之每賜必均始歡然共食蓋孝友出自
天性云

四十五年丙戌

七歲從舅氏沈公電文煥受學日誦百餘行過耳即
通曉大義好作字遇楮墨輒淋漓揮灑大父越石公

雅好古藏法帖碑版甚富遂令日夕縱觀時為講畫故於擘窠大字自幼即工

四十六年丁亥

八歲曾大母章太夫人八十有五壽終越石公哭甚慟先生從旁飲泣如成人

四十七年戊子

九歲

四十八年己丑

十歲讀遍九經時有同學王某年相若資穎尤絕出一日隨師游淨慈寺約背誦寺門榜文某一覽即熟

先生至三過於是常以不及人為恥

四十九年庚寅

十一歲

五十年辛卯

十二歲從淳安汪公占五

受學試筆三閱月即

成篇里中向有文社先生與焉同人皆年長以倍見先生尚未成童特為講析題義及脫稿眾咸驚嘆閱文者取冠曹偶能文之名始此

五十一年壬辰

十三歲出應童子試與孫公虛船灝訂交

五十二年癸巳

十四歲初爲文尚循謹繼從表叔周公理齋

經邦遊

教以文章任人自爲不拘一格先生大悟行文日進

五十三年甲午

十五歲讀畢十三經旁涉子史有手批漢書雖隨筆
點定而高論卓識老師宿儒未有以過

五十四年乙未

十六歲十月十三日大母秦太夫人卒先生哀毀骨
立大父越石公憐之曉以大義仍令置榻寢旁親加
督課夜分不休雞三號輒起制義稿中事君盡禮一

節射不主皮一節題文是時作也

五十五年丙申

十七歲手鈔五經左國并史記兩漢唐宋諸文集時
加論斷旋燬於火先生強識博聞得於天性凡書經
繙閱佳處悉成誦終身不忘鬻書者輒相戒曰汝毋
遽與某書留信宿卽不復問值矣

五十六年丁酉

十八歲猶困童子試以不得赴秋闈爲恨大父命作
闈題七藝質之鄉先輩何公仲穎 亟許之大父
有喜色訓之曰君子貴知命若果有必售之技何患

無遇合耶是以先生一生自登名場歷仕進垂四十餘年未嘗以賢智先人修身俟命得力於祖訓爲多

五十七年戊戌

十九歲受知于學使者大理寺卿汪公荇洲藻補錢

塘學博士弟子員試題湯之盤銘曰一句先生幼時

恆著麤布衣至是大父喜搜篋出白金二錠付臯亭

公曰兒既爲諸生可市繪以寵之會表叔吳某倉黃

來泣告晨炊不舉者三日矣大父憐之而無以應臯

亭公曰金故在也兒無衣猶足禦寒孰與無食而就

死也先生卽舉以贈之

五十八年己亥

二十歲

五十九年庚子

二十一歲鄉闈報罷益銳意於學與同時名宿梁設

林啟心暨弟薌林詩正汪積山惟憲倪穉疇國璉金

長孺虞任處泉應烈孫虛船灝杭堇浦世駿嚴季傳

在昌諸先生相切劘福清李鹿山先生馥來撫浙首

拔先生於諸生中令入敷文書院肄業同社諸公亦

先後入院後並掇科第歷臺省著聲於時

六十年辛丑

二十二歲

六十一年壬寅

二十三歲正月五日周夫人來歸同里燕皇公次女也三月結文社於西湖藕花居何鳴世姚瑞吳子廉

國鏢吳春郊景任處泉應烈孫介斯曾禔錢蒼益在

培汪履順金城汪介純宏禧梁護林啟心杭堇浦世

駿梁薌林詩正王琬華瀛洲金以寧文濟孫虛船灝

裘滄曉肇煦金雨叔姓陸賓之秩暨先生十八人相

序以齒哀其文曰質韋集明年癸卯 恩科登賢書

者三人汪公金城王公瀛洲金公姓甲辰補行正科

登賢書者亦三人杭公世駿孫公灝暨先生丙午登

賢書者亦三人汪公宏禧梁公詩正裘公肇煦已酉

登賢書者二人任公應烈陸公秩壬子登賢書者一

人梁公啟心乙卯登賢書者三人何公姚瑞錢公在

培而金公文濟改名焜以北閩捷丙辰 恩科中副

車者一人孫公曾禔戊午登賢書者一人吳公國鏢

中副車者一人吳公景繼復次第登甲科躋位通顯

亦一時盛事也

雍正元年癸卯

二十四歲是年春三月鄉試先生薦而不售五月二

十日長子玉藻生後更名玉萬

二年甲辰

二十五歲三月補行癸卯正科鄉試首題斯民也一節次題溥博淵泉而時出之合下二句三題放勳曰勞之來之七句先生中式第四十六名舉人房師知瑞安縣河南孟縣薛公儒升號仿山座師閣學建昌李公鳳翥考功郎中黃岡王公一導薛公得先生卷詫爲熊漢陽復出薦元不獲爭之語過激王公不憚幾欲斥去薛公手自批頰以謝王公亦謝後先生嘗手錄闡文紀其事有報恩無藉宿草再新之感先是

薛公去任入都父老攀轅泣送饋米肉者相踵先生

賦七律一章送之未有聞說醵錢煩父老陸莊荒盡奈愁何之句蓋紀實也時大父越石公歸自嘉禾得

疾至六月七日卒先生號慟不已不忍赴禮部試值

期迫戚友促行不得已就道力疾入闈孫文定公嘉

淦得先生卷力薦不售十月歸里時仲弟眉山受知

學使者茶陵彭公維新補錢塘縣學博士弟子員

三年乙巳

二十六歲授徒於家之紫竹山房從遊者周讓谷天

度沈雨齋隆沈厚田范李次金情皆一時能文之士

後讓谷領庚午解壬申成進士次金厚田亦先後領鄉薦雨齋文尤奇早天士林惜之先生於講貫之暇裒集新舊所作制義付梓世所傳句山一刻是也時淳安方公朴山黎如來杭先生持所刻就正之朴山語人曰快哉陳君之文令我讀之汗出古人云可愈痼疾其殆是乎桐城方公靈臯苞在都見先生稿稱爲根源盛大氣宇高深望之有深山大澤龍虎變化氣象必傳于後無疑且云是必長於古者命子弟致書索觀數篇甚稱得古文正宗其爲先輩所膺服如此

四年丙午

二十七歲授徒於家三月初十日次子玉敦生十二月將隨計偕會海寧查氏日記事發詔停浙人會試不果行

五年丁未

二十八歲授徒于同里徐氏從遊者甚衆

六年戊申

二十九歲館徐氏

七年己酉

三十歲仍館徐氏四月三子思道生及晬而殤八月

溧陽任公

蘭枝

常熟王公

峻

來主鄉試先生謂仲弟

兆嶠

暨嚴君

在昌

文雖不合場屋尺度如得薦無不

售者榜發果然十二月公車北上同行者梁公薈林

徐公笠山

廷槐

汪公介純杭公薈浦任公處泉孫公

虛船裘公滄曉嚴公季傳其第十區

璣

暨先生昆弟

凡十一人抵泰安度歲

八年庚戌

三十一歲正月抵京同行者復同寓禮闈首題志於道三句次題自誠明一節三題見其禮而知其政一節先生最後出梁公薈林曰遍觀合寓文以虛船爲

最先生卽背誦就質孫公虛船自以爲不若榜發被

放者惟杭公薈浦暨先生仲弟二人餘九人皆獲雋

總裁爲大學士常熟文肅蔣公

廷錫

侍郎長白文端

鄂公

爾泰

冢宰興縣文定孫公

嘉淦

宗伯溧陽任公

蘭枝

同考房師則編修武進吳公

以第一人薦蔣

文肅公擊節不置因得卷遲前列已進呈無可易遂置二十一名殿試八二甲朝考誤以第三題爲首題格於例不錄首輔某耳先生名又以朝考之誤深爲惋惜欲致先生於幕爲之保薦先生堅辭之因是失首輔歡後雖入館閣列門下共事者十餘年遇事輒

抑之先生亦無悔焉是時值 怡邸薨逝 聖情

震悼罷新進士賸員引 見概予分發隣省試用知

縣先生得福建七月一日偕仲弟暨杭公堇浦買舟

南還一日午倦欹枕夢停舟荒岬緣堤獨行忽逢古

塚門洞開見大父越石公坐其中呼先生名曰汝毋

以不入詞垣為怏怏汝尚有科目在後故有此蹉跌

耳汝其勉之及寤以告堇浦曰鄉會兩榜已倖列名

更有何科目堇浦曰不然今

皇上勵精圖治留意人才 詔舉孝廉方正安知不又

開博學鴻詞科我與君同膺其選耶後三年果如其

言八月抵杭留兩月十月赴閩度仙霞嶺有和周櫟

園石刻詩至閩寓開元寺

九年辛亥

三十二歲在閩需次制府長白郝公 玉麟 中丞泰安

趙公 國麟 特加愛重不以屬吏相遇學使戴公巨來

瀚 有著述必經先生點定乃刊行攝鰲峰書院山長

日夕進諸生講論聖賢之學先本後末要於實踐因

文闡道有不軌於正者悉以法度繩之又總領福建

通志局于忠孝節義多所表揚與閩中鄉先達謝古

梅編修道承黃莘田大令任共事相契厚暇則遊烏

石山鼓山塢湖石倉諸勝聯吟染翰傳播士林五月

十三日四子玉成生

十年壬子

三十三歲主講鰲峰兼領志局八月充福建鄉試同

考官得士十一人皆一時名宿後任温州太守俞文

漪其一也同年杭公堇浦亦就聘閩闈先生作七律

二章誌喜杭依韻和之

十一年癸丑

三十四歲主講鰲峰兼領志局四月八日奉 詔薦

舉博學鴻詞制府郝公中丞趙公稔知先生品學語

人曰陳君吾非特愛其才并重其人

上命某等各舉所知殆未有出其右者即日集知名士

於貢院局試時先生病日頗劇夢人以竹葉露灑日

中覺時滿室光明帳外猶見竹葉影次日遽痊題凡

四策論詩賦先生援筆立就呈卷時尚未午咸驚其

速督撫卽於試院具本所舉惟先生一人

十二年甲寅

三十五歲三月志局告竣仍主講席七月將北行有

留別陳師顏秀才詩師顏名發閩人與修志局每會

飲酒酣對先生輒嗚咽流涕謂我與公同為峨嵋山

寺僧寧忘之耶舉坐愕然九月十日抵家

十三年乙卯

三十六歲二月二十七日自家就道途中遇名勝輒留題館都中以俟諸徵士是年八月二十三日

世宗憲皇帝龍馭上賓十一月初十日奉

上諭以現在保奏鴻博人數寥寥切責內外臣工再予一年限齊集京師候旨廷試十二月閣臣以中書懸缺需人請試士於東閣新例凡保舉鴻博人員舉人進士出身者亦得與試先生祈籤正陽門關帝祠云一生心事向誰論十八灘頭說與君世事盡從流水

去功名富貴等浮雲解者以爲內藏一等頭名四字赴東閣試榜發 欽取一等一名授內閣撰文中書旋入軍機處行走有迎歲早梅新試帖前先生南還舟中夢大父云有科目在後蓋不獨鴻詞也

乾隆元年丙辰

三十七歲官中書兼軍機處行走大學士鄂文端公愛先生才遇事相倚重先生寅入酉出不敢辭勞二月二十四日奉

上諭內外臣工所舉博學鴻詞聞已有一百餘人祇因到京未齊不便卽行考試先至者未免旅食艱難著

從三月爲始每人月給銀四兩資其膏火在戶部按名給發其未到之人俱著九月以前到京於是四方徵士雲集臨期又奉 恩旨天氣漸寒著在保和殿內考試 欽點大學士鄂爾泰張廷玉侍郎邵基閱卷康熙十八年舊例鴻詞僅試詩賦考前二日御史某入奏云鴻博之學必通天徹地無所不知若僅試詩賦凡屬詞臣所能不足以窺底蘊于是試凡二場第一場五六天地之中合賦山雞舞鏡詩黃鍾爲萬事根本論第二場經學史學策問各一道卷凡一百七十有二十月初三日閱卷官擬取一等五名二等

十名進呈 御覽 欽取二等二名十月初五日吏

部帶領引 見授翰林院檢討蒙 賜日知薈說一

部同入選一等劉公綸潘公安禮諸公錦于公振杭

公世駿二等楊公度汪劉公玉麟後更名溱沈公廷

芳夏公之蓉汪公士鏗陳公士璠齊公召南周公長

發程公恂並先生十五人照康熙十八年例分別授

翰林等官二十五日踏雪赴翰林院任有口占示諸

同年詩

二年丁巳

三十八歲正月恭遇 覃恩封父臯亭公徵仕郎翰

林院檢討 封母沈孺人又以本身及妻室應得

封典 馳贈大父越石公大母秦如例三月會試充

同考官分校禮記卷得辛 有光 談思永 左逢源 觀保

王 其章 洪本仁 饒國材 黃培 任時遠 羅鳳儀 郭新隣

胡 汧文 等十三人又兼校別經卷得周 煌納 國棟

路 斯道 葛萃 潘宏道 陳封舜 等六人五月充

世宗憲皇帝實錄館纂修官兼

三朝實錄館校對官是月七日考翰詹諸臣奉 旨特

免詞科翰林考試仍照優等賞給蒙 賜 御製墨

刻及端硯筆墨紗葛數種六月仲弟 兆嶠 考授內閣

中書遣人南還迎養封翁及母沈太夫人封翁以高

年服習故鄉水土不願遠行命周夫人偕仲弟婦張

宜人率子女至京師

三年戊午

三十九歲三月京察一等加一級四月考試差 欽

取一等六名

四年己未

四十歲三月張藻川侍讀 映辰 視學湖北邀先生仲

弟偕行次齊二瓊臺 名南 詩韻送之七月有秋懷詩

六章寄仲弟

五年庚申

四十一歲二月

世宗憲皇帝實錄告成議敘一等 恩賜表裏有差
六年辛酉

四十二歲三月京察一等加一級四月考試差 欽

取一等四名六月十五日 命典湖北鄉試以編修

聞棠副之聞公丙辰館選同年也先生以楚號多才

竭心力二十餘晝夜取中張夢楊等五十三人填榜

時監臨范公奠文燦曰楚有諺云若要好看黃孝今

所中黃岡孝感居多實眾所膺服後五十三人登甲

榜者十之六七甲戌會試胡公紹鼎中會元入詞館

夏比部扶黃李太守長青其尤著也是科落卷先生

一一別其純疵明白批示發卷後下第舉子多來求

見先生指以要領各得其意以去有劉名龍光者聞

先生講論感激欣喜至於泣下次科聯捷成進士歷

官御史終其身執弟子禮十月回京復 命

上垂問楚北文風先生以清真雅正對 溫語移時以

賜金寄奉封翁封母及三黨之不足於衣食者曰予

以非才得邀 寵任不可不合親族子弟共沐

君恩冬日病中有書懷示仲弟閔風詩

七年壬戌

四十三歲二月以原銜充 日講起居注官三月充

會試同考官闈中有和大學士鄂文端公入闈言志

詩先生仍校禮記卷得舒敏邵齊燾李金臺周宣武

朱盛江廖運芳黃占鰲劉思忠陳大復朱涵林孔煥

周禮東馮立朝舒祿王靖鄒本立盛英田沈等十八

人又兼校別經卷得劉瓚亢保王三曾趙聖佐黃寬

趙核鄧琮周於智陳旭何紹東毛復亨陳琳王錫命

王世仕馮子式等十五人七月充明史綱目館纂修

官總裁屬先生具草定體例進呈奉 硃批褒美九

月以歷俸久與省親例符請命于臯亭公公馳書止
之遂不果

八年癸亥

四十四歲正月晦日侍班奉 勅恭和 聖製咏雨

三月十七日夜先生夢臯亭公問臨文不諱二名不

偏諱之義夢中以他語對既寤念舍故諱新于占不

吉心搖搖不自安未幾翰林輪班引 見奉 命和

御製十駿圖長句三十二韻詩題第二字臯亭公諱

也于是釋然以為驗在此矣詩成蒙 賜克食畫扇

毫筆即郵書報臯亭公越四十日 御試翰詹人員

于正大光明殿先生列二等奉 旨以應陞之缺列
名奏請旋聞臯亭公訃蓋前見夢之日卽臯亭公得
病之日也先生與仲弟跣奔南還舟過維揚同年朱
公續暉爲兩淮運使途次來唁具知清況固請留信
宿謀所以潤行色者先生謝不可卽日遄行先是阻
風黃河先生語仲弟曰吾時覺神理不寧何也比至
里門始知是夜鄰人不戒于火距老屋僅一壁支山
公守苦次倉皇呼輿夫舁柩猝不可集仰天號泣誓
與棺同燼臯亭公素有德于里人于是麋至掖柩以
行甫出門火燄及屋頃刻灰燼明日權厝於城西錢

氏莊而奉太夫人賃屋以居先生至趨莊所擗踊不
止子弟輩扶持至賃屋哭拜太夫人于膝下嗚咽不
能成一語晚復詣苦次居月餘感寒疾奉太夫人命
入城疾少瘥九月與兩弟經紀喪事述臯亭公行狀
數千言見者無不墮淚旋購屋柳翠井巷奉母移居
焉

九年甲子

四十五歲應同年紹興太守周少白範蓮之聘主講

蕺山書院挈兩子

玉萬玉敦

汪甥

邦憲

隨往讀書

邦

憲字寶臣先生長姊出也後二年丁卯領鄉薦甲戌

明通榜得縣令歷官江南之江陰陽湖縣知縣有治聲至蕺山日越中諸生樂先生至課日遠近畢集風雨無間一時稱盛有張生嗣益工時文年長於先生而師事甚恭所刻稿皆先生點定又有錢生景綸耄而好學尤所賞識明年殂謝先生爲之泣然刻其遺文并書後曰文章憎命達何處哭秋風檢視遺編凜有生氣輒復附識崖略俾後輩知稽山有種學績文老死不遇之錢景綸也先生愛才不沒人善類如此十年乙丑

四十六歲王講蕺山仁和韓

朝衡

長洲翁

起璜

相隨

受學朝衡字開雲後成進士與館選改官部曹歷廣東觀察起璜字韜伯以孝廉官國子學正七月服除未赴補刻蕺山課義學者翕然宗之與諸生遊覽越中古蹟如禹陵南鎮廟明祁世培先生讀書處吼山水旱二宕皆有詩紀之

十一年丙寅

四十七歲正月同季弟渡江至餘姚眉山省先墓遵祖志也有紀事詩六十韻二月明史綱目告成先生向任纂修奉旨議敘紀錄二次閏三月上巳同人修禊湖上效蘭亭體賦詩集者五十餘人爲一時盛

事四月太夫人促先生昆弟北行諭曰吾誠不忍爾兄弟遠去顧陳氏式微久兩世未葬懷安敗名君子所恥汝曹安得鍵關而臥耶先生泣請留仲弟於家五月啟行日晡時出關與閻風支山兩弟相抱慟哭而別舟中有邵寄詩以見志長子玉萬先於乙丑秋就婚大名司馬吳公日省元鑿官署先生自濟寧登陸由張秋取道大名遂挈長子赴都故事翰詹衙門凡丁憂回籍者仍入京察至是補行引見奉旨准其一等加一級八月二十八日詔廷臣自大學士以下翰詹科道以上賜宴西苑瀛臺宴畢詔諸

臣得周遭瞻仰能詩者集流杯亭候旨發韻聯句仿柏梁體賦詩先生與焉大司馬哈公傳旨今日坐立任便一切無拘禮數先生恭用亭臺二字各得二十四韻成詩二章以進

十二年丁卯

四十八歲二月祭先師孔子奉詔分獻是日

慎郡王承祭故事分獻十哲以編檢俸深者爲之有

和同年程慄也恂詩二首紀事三月京察一等加一

級奉勅恭賦玉甕詩五月充國朝會典館纂修

官九月充日講起居注官奉派教習乙丑科庶吉

士十二月集鄉人作消寒之會凡八題各賦其一先生并作之

十三年戊辰

四十九歲二月 聖駕東巡展謁 孔林秩祀岱宗

禮成恭紀七言絕句十二首三月十一日恭值

孝賢皇后大行祭文例由翰林院撰擬惟先生擬進者得俞旨掌院張文和公廷玉特奏明專任焉五月考試翰詹諸臣先生列三等七月奉派教習庶吉士越數日得沈太夫人訃音星夜跣奔而先生季弟方以哀毀卒先生抵家見兩棺在殯號慟不能起十一月

與仲弟爲太夫人發喪權厝于南屏山之普渡菴而

以季弟樞附厝焉作太夫人行述又爲季弟作傳畧

付弟孤玉繩乾隆癸卯杭州太守邵公齊然重修府

志以此傳并先生所爲仲弟眉山先生行略載入孝

友傳壬子春梁山舟同書侍講爲合寫兩傳刻于石

十四年己巳

五十歲河庫道何公燭延先生至官廨課其子裕城

及姪某二月赴淮舟過丹陽泊堤畔遇解秋審人犯

數船自鎮江往蘇牽百丈而行礙先生船桅不得出

上船詬辱舟人方與辨解役等突率衆囚徒闖入艙

各持器械雜手中鐵鍊指揮先生方與柴孝廉右麟
騏生對奕猝被一人連毆三鐵鍊頭顱脊背被創重
血涔涔滿舩昏暈不能言舟人及奴輩知不敵俱散
匿凶徒悉舟中所有胫篋以去蓋每歲秋讞時橫行
以爲利藪也先生痛定後命奴子覓小舟伏艙底疾
進鳴于丹陽縣合倉猝不能指其人令曰人犯過境
例須到縣點勘汝立吾座後按名指認無所逃果得
若干名下于獄撫軍雅公得詳具奏立置重典辛未
歲起復入都

上方自南巡還京先生於道旁接 駕猶垂問此事并

笑曰汝何不言雞肋不足以當尊拳耶自是每逢召
見輒問及

十五年庚午

五十一歲二月仍赴清江館河庫道署與河督張公

師載

商定陸清獻公年譜刊行之與門弟子講中庸

性道教之旨作理筌三月京察列一等時錢唐梁文
莊公爲掌院與先生同里同年御史歐公堪善以徇
私彈奏辭連上年舟過丹陽被毆事以爲其人必非
安分而列入優等梁某未免瞻顧同鄉 聖意稍爲
之動卽日 召見文莊文莊奏曰陳某在翰林前此

已四入京察無不定爲一等者臣雖欲矯情避嫌其
如朝廷公議何

上亦悟從容諭曰自後有則改之無則加勉文莊奏曰
臣領

皇上無則加勉之訓同列者咸嘆爲得古大臣風六月
率諸子弟回浙鄉試是科正主考詹事裘公日修副

主考編修歐陽公正煥榜發二子玉萬玉敦同領鄉

薦解首卽表弟周天度次子之妻兄秀水汪孟錡弟

仲錡亦中式時皆同寓先生家爲一時之盛凡試文

經先生許可者如汪公永錫趙公佑葉公藩吳公泰

不特是科獲雋聯翩成進士或由詞垣至卿貳或由
縣令至方面十不失一十一月服闋還朝挈汪甥

邦憲同行

十六年辛未

五十二歲正月抵都二月署日講起居注官旋奉

旨充補四月

上南巡回鑾謹擬連珠三十首以進五月補行十五年
京察引見奉旨准其一等加一級閏五月充續

文獻通考館纂修官奉派教習庶吉士七月御纂

詩經補註命孫文定公主其事先先生與宮贊金公

牲分任纂修有上孫文定公書酌叅同異往復數四
文定多從所議十一月二十五日

皇太后六旬萬壽先生敬撰詞十二闕并序以進奉

恩詔加一級以京銜加級請封視四品 誥贈父臯

亭公朝議大夫 日講起居注官翰林院檢討母沈

贈恭人又以本身及妻室應得 封典馳贈大父

越石公大母秦恭人如例小除夕侍

上歲暮裕祭

十七年壬申

五十三歲元日侍班 慈慶宮門十五日侍班陪宴

二月

上御經筵進呈君子之於天下也一節講義

上覽畢詢問諸大臣曰何人擬擬蔣文恪公溥以陳某

對

上稱善久之不數日擢詹事府左春坊左中允四月

命副少司馬觀保典順天武鄉試得顧麟等如額顧

于是歲十月聯捷會狀爲武三元哈國興亦聯捷歷

任雲南四川提鎮後殉節金川入昭忠祠六月考試

翰詹諸臣 欽定二等一名擢翰林院侍讀學士

十八年癸酉

五十四歲二月六日以講官扈 蹕 東陵途次奉

勅恭和 御製古今體詩三十七首三月還京

察一等四月六日庶常梁元穎 同書 秋部幼循 敦書

招同閣學潤亭徐 以烜 廷尉藻川張 映辰 給練驥超

程 鍾彥 編修時翔許 集 馮夢亭 浩 庶常錢籜石 載中

翰倪敬堂 承寬 集清勤堂看藤花卽席賦詩又同過

虎坊橋呂氏園看藤花有和藻川偕過街南看古藤

長歌時錢籜石精繪事畫藤花於絹素在座諸公題

詩其上一時傳爲美觀至今畫軸尚存梁氏六月擢

太僕寺卿九月充續文獻通考館總裁先生由纂修

總領書局 寵眷逾格日與分纂諸公虛衷商確窻

牖屏帷籤帖殆遍各門總序先生所作爲多

十九年甲戌

五十五歲二月 聖駕東巡恭謁

祖陵禮成恭紀七言律詩二十首末章結句云臣心絕

似扶輪草千里依依不斷青忠愛纏綿一時傳誦六

月次子 玉敦 考取內閣中書人稱中書世家蓋先生

與仲弟皆由舍人起家也十一月擢順天府府尹先

生以輦轂重地五方雜處吏胥多因緣爲奸遇事悉

心釐剔慎刑愛民未嘗稍事笞責會西陲用兵調發

索倫勁旅於德勝門外分隊屯駐陸續前進先生與
少司農兼府尹武進劉公綸經理宿頓儲備各事宜
檄飭所過屬邑隨宜籌辦令大宛兩縣率鋪戶陳設
弓矢器械于城外短衣策馬護送出居庸關有德勝
門營盤紀事詩八首又有出關至懷來途次雜咏十
六首

二十年乙亥

五十六歲正月送定北軍出居庸關事畢還京初順
天府屬置官車募民充領官給白金八十兩為造置
馬騾費有事應用無事聽自謀生行之既久車馬疲

做力不任修者求退籍官或簽富民以代胥役從中

為奸而官車遂為民累先生洞悉其情與兼攝京尹

侍郎劉公

綸

制府方公

觀承

奏罷之民大稱便方公

又以各道府議令各屬派民車入官冊郵書往復先

生痛言其未便者三詳見文集方公得書意解議遂

寢五月長子隨侍周夫人率眷屬抵都寓六月伊犁

底定奉 恩詔加一級又以料理軍行各事宜軍功

議敘加一級隨帶九月觀風所屬二十六州縣及八

旗生童拔其尤者給紙筆書帖獎勵之而于金臺書

院尤加意焉延歸安姚明經

汝金

主講席文風由是

益振明年丙子至丙戌十年凡四遇鄉會試連登甲榜者不勝指一時稱盛

二十一年丙子

五十七歲三月京察遵例自陳蒙恩留任五月望日

上幸黑龍潭拈香越三日大雨霑足恭紀一篇八月順天鄉試充監試官先期申明勸諭榮辱得失大義作奸犯科者皆斂迹終場帖然江蘇舉子某誤帶首場文稿入二場幾罹于法先生力救得免十月充順天武鄉試監臨官又奉旨充校射官十一月轉太常

寺卿先生爲京兆廉靜愛民事無鉅細必與制府和衷共濟方公宜田常語人曰陳公與僕交好有素但知其文學優長不料吏治若此讀書人不可輕量信哉

二十二年丁丑

五十八歲五月

上巡幸江浙回鑾先生擬頌十章并序以進

二十三年戊寅

五十九歲

聖駕謁

陵還京緣同官某失儀改補太僕寺少卿十一月西域
效順 大閱禮成恭擬四言古八篇并序以進十二
月奉 旨在 尚書房行走越五日遷通政司副使
蒙 恩賜福字并豐貂文綺荷包牋帙筆墨麀鹿湯
羊魚雉果餌之屬夏則紗葛蕉扇繡囊葯錠歲以爲
常不可勝紀

二十四年己卯

六十歲正月四日赴

西苑寓園

玉繩

隨侍寓園卽

鷗鷺澄懷園

御賜書房行走各臣所居處也六月

奉 勅恭和

御製喜雨十首元韻有序七月四日

皇上巡幸木蘭奉

命隨圍先生始至塞外朔風吹雪

馬力凌競輒攬轡口占以紀山川之勝吟咏特多十

月還京適西師大武告成奉

恩詔加一級先生恭

擬露布一篇以進十一月奉

勅恭和

御製玉盤

謠疊舊作元韻十二月初六日先生六十誕辰 皇

子 皇孫書房師傅及同年同官競爲祝嘏之詞先

生自慚緩葬有年不敢當賀

二十五年庚辰

六十一歲正月四日赴

西苑寓園

玉繩

隨侍四月

爲 玉繩

娶同里倪奉常敬堂之女五月門人周海山

學士煌奉命典試閩中觀補亭少司馬保有詩贈

行先生即步其韻送之兼寄福州詩人黃大令莘田

六月送門人觀少司馬補亭典試浙江用介野園福

疊去年公餞詩韻九月皇四子寄示隨園詩冊謹

用冊中見懷詩韻奉酬皇八子亦有詩見懷謹次

元韻

二十六年辛巳

六十二歲元日欽天監奏是日午時日月合璧五星

連珠允符文治大同之盛又稱雍正三年曾遇此祥

而茲則木火土金水順序實亘古以來未有請宣付

史館垂光萬世

上以天行有常未允所請有恭紀詩四月赴西苑寓

園玉繩隨侍七月扈蹕巡幸木蘭時伏雨暴注沿

途積水無路先生躍馬徑度至清河有雨中騎行自

和癸酉年黃新莊韻詩雨盛失道暮投沙沽堆廢寺

與不識姓名武衛士共席暝坐遙亭子倍道追扈

大駕及于常山峪有七律一首常山峪追及介野園

觀補亭兩侍郎同榻村店夜話得七律一首後一日

抵熱河波羅莫林止頓二日得即事斷句四首又奉

勅恭和御製古今體詩原韻二十三首十月長

子玉萬考充景山官學教習十一月二十五日

皇太后七旬萬壽先生敬撰樂歌十四章并序以進奉

恩詔加一級蒙

皇太后賜文綺豐貂是時耆英皆集京師祝嘏先生有

卽席呈錢香樹尚書陳羣七律二首又有送王芝圃

訓導世芳以六品服還遂昌訓導任七律一首王台

州臨海人時年九十有八後壽至百十有餘歲十二

月蒙 恩賜貂褂

二十七年壬午

六十三歲正月送 駕南巡後日直 尚書房有歲

暮卽事新歲卽事詩二月以上冬

皇太后萬壽覃恩奏懇以本身及妻室應得 封典馳

贈曾祖父母得 旨俞允贈曾大父元燮公通奉大

夫通政使司副使加二級又軍功加一級曾大母王

繼曾大母章皆夫人祖父二世亦如之時次子玉敦

官中書例得封及父母故事父以現任官請馳封上

世例不得受子封其子願以本身及妻室應得之封

馳封父母者可又父階崇于子者封如父官不得論

加級于是先生蒙 恩封中憲大夫配周夫人爲恭

人三月京察一等八月病瘧 皇八子自圍中以書

見問有代箋呈謝詩二首病中作古風十四首十月
恭和 御製題鏤玉百子屏風原韻五排一首寒夜
漏盡上直得七律一首

二十八年癸未

六十四歲正月四日赴 西苑寓園三月迎 駕湯

山是月手臨孫過庭書譜全卷復爲釋文一通四月
至六月手臨晉唐迄元諸名人法書一函秋日 皇
六子爲先生作紫竹山園圖並爲題詞諸 皇子

皇孫皆有題咏中秋日與邊秋崖侍讀繼祖盧召弓

侍讀文昭赴熱河番直九月二十二日自熱河回京

十一月 上召見書房 諸皇子視 八阿哥形容

清減疑有內病命專教師傅隨往 西苑書房讀書

寓園橋爲雨坼假寓善緣菴

二十九年甲申

六十五歲正月二日奉 勅恭和 御製新正二日

宴蕃使于瀛臺紫光閣元韻詩四日赴 西苑寓園

四月自善緣菴移歸鷗鷺莊官寓 皇八子有詩見

贈次韻奉答二首伏日手臨宋搨定武蘭亭一卷付

玉繩 梁侍講山舟跋壬子二月借刻于曲阜孔氏玉

虹樓六月中旬自 西苑乘馬下直馬驚墮傷左指

及頭骨瀕于危 皇子遣蒙古醫者青喜來視以食
鹽撒火酒中洗其傷以牛羊肉切片炙次第取帖七
日漸平三閱月始瘥左手中指不復能屈伸作述病
六首初冬迎 駕順州十一月作謹疾箋一篇上
皇八子騰月病中 皇八子馳使餉粥賦詩呈謝

三十年乙酉

六十六歲元旦早 朝恭和 御製元旦試筆韻二
首八日蒙 賜宴重華宮聯句又和 御製重華宮
召內廷翰林作雪象聯句畢仍賜曲宴原韻二首蒙
賜西壁舊硯一方上鐫

聖祖仁皇帝硯銘三月京察一等四月

皇上鑾輅四巡江浙還京恭擬賦一篇并序以進蒙

睿鑑采列陳設越數日蒙 恩賜鄭宅茶一瓶五月

赴 西苑寓園七月 駕幸木蘭曉赴大東門恭送

有紀事詩秋 玉繩得疾幾危久不愈先生憂之深以

不達醫意日檢本草注觀之中秋雜咏有平生不解

黃岐術細字昏燈難老夫之句冬寒夜趨直 乾清

門未啟奉硯亭 寬劉圃三 星煒繼至語次成七律一

首

三十一年丙戌

六十七歲正月四日赴西苑寓園二月仲弟眉山

公訃至先生自西苑馳回南城設位以哭以次子

王敦為之後作行略一通付令南歸並令玉繩偕行

眉山公常語玉繩曰我善病不獲享遐年但願死阿

兄前阿兄為我作行略藉以傳于後吾目瞑矣秋患

頭風頗劇九月有述夢兼序哭弟老懷寄敦繩兩兒

詩月杪迎駕三角淀冬日病中蒙恩給假十五

日

三十二年丁亥

六十八歲正月六日上辛立春蒙賜宴重華宮聯

句又恭和御製立春祈穀禮成召大學士及內廷

翰林曲宴重華宮聯句並得長句二首元韻詩二月

上幸天津觀河望海指示瀦洩機宜先生考諸

水源流恭擬賦一篇并序以進晚春迎駕南海子

三月諸皇子奉命校獵南苑衆師傅侍從寓德

壽寺五月蒙恩復授太僕寺卿先生十四年前曾

任此官恭紀七律一首先生自庚午十一月內艱服

闋明年春將還朝值六飛初幸江浙夜夢偕同

鄉諸老迎鑾道左忽自覺首無冠倉皇顧同列見

張公藻川首有數冠取戴其一俄驚醒向家人輩言

之咸以爲笑不料竟成終身之讖時藻川方官太僕
丁憂家居先生未開坊後由學士遷冏卿由冏卿遷
京尹太常又由太常左轉僕少遷通副後復由通副
遷冏卿至此凡三任太僕自後五年不轉一階是月
長子玉萬教習期滿引見奉旨以知縣用
皇上巡幸木蘭諸皇子扈從先生休沐寓園晚秋迎
駕南石槽

三十三年戊子

六十九歲正月六日蒙賜宴重華宮聯句恭和

御製重華宮曲宴元韻二首是月歸汪氏長姊訃音

至陽湖令

邦憲

之母也卒於陽湖官署去仲弟歿纔

一載先生篤於同氣自是居常忽忽不樂而精神意
趣日減矣三月京察遵例自陳奉旨照舊供職先
生以先世兆域未卜言及輒淚下會連歲遭姊弟喪
益憂切九月命長子玉萬隨侍周夫人率眷屬南還
次子玉敦官中書六年俸滿奉旨記名外用留京
供職十二月奏懇給假歸葬蒙恩准行

三十四年己丑

七十歲正月二十二日出京皇六子繪圖送別并
繫以詩皇八子作擬古四章送行皇子以下俱

年譜
差官集送於東門朝士祖餞不絕于道晚渡蘆溝宿
長新店有詩題壁至陽湖西郭悼長姊有作二月二
十七日抵里門哭拜于先人墓次四月假館于同里
孫氏以詩文質者遠近畢至八月先生次子玉敦以
中書改官山東登州府同知初冬買地于三台山青
石嶺之原十一月十八日丙申奉祖父越石公祖母
秦太夫人合窆焉自視工作寓建福寺月餘遵遺命
勿外求貴人銘自述墓誌一通

三十五年庚寅

七十一歲二月有族子某爲父病持祖遺田契來求
售先生廉其情領囊與之而還其券曰乘人之危而
謀其產施之外人尚不可況同族乎某感謝以去三
月卜吉於法華山之西原土名三方廟奉皇亭公母
沈太夫人合窆寓鄭家菴三月工畢始歸有述夢紀
事詩四十韻五月假滿赴闕時長子玉萬亦謁選
隨侍入京抵都日詣西苑宮門具摺恭請聖安
奉旨仍著在尚書房行走諸皇子喜先生如
約復至各有詩見贈皆次韻酬之八月十三日
皇上六旬萬壽先生謹製序文一篇恭進梁侍講同書
來朝慶節復班見於清河道左當奉溫諭南歸先

生自以 恩重不敢乞身而意不能無慕因詩以代
餞未有莫怪老羸慵折柳對君慚汗出如漿之句是
月長子 玉萬 選授山東濟陽縣知縣先生自雍正庚
戌以榜下分發知縣居閩五年洞悉州縣之利病後
爲京兆尹益知其弊故于兩子之官往復提撕危言
切戒兩子各條識行箴不敢忘前則同官山左繼又
同官江南皆以廉靜稱先生之教也十月七日南石
槽接 駕有紀事詩初九日夜漏未盡雪甚下

上詣

太后宮問安侍臣有不及入班者恭紀一首是日冒雪

下直有懷十八臺吳太守

兆基

得長句一首太守字

自堂戊午順天榜舉人由縣令起家先生長婦兄也
時先生未得缺蒙 恩准照原官一例食俸以資贍

給十二月十六日雪恭和 御製原韻詩二十七日

上集內廷諸臣 賜福字先生跪領畢蒙 恩指名垂

問良久始出

三十六年辛卯

七十二歲正月朝賀畢仍入直 尚書房歸則擁爐

一室手訂諸生著述賓戚讌談未嘗示倦初十日與

同人集飲于補亭觀公宅十四日發家書寄兩子蠅

頭細字幾萬餘言下午忽疾作既而漸劇二十日夜
夢至青石嶺祖墳見列筵甚豐旁一人指示祖所賜
者又至三方廟父墳亦如之自知將不起二十二日
奉 旨派侍 皇十二子讀書先生已輾轉床褥不
獲仰承 恩命時費甥 雙元 隨侍遂索紙筆作遺本
付費甥越四日病益劇遂卒乾隆三十六年正月二
十六日寅時也乾隆四十八年杭州太守邵公 齊然
修郡志先生與眉山公並載人文苑傳

年家子梁同書填諱

句山老人紫竹山房詩鈔

嵩慶校錄

福州元夕閒行口號

過臘寒冰暖欲融
牢愁半破鼓聲中
清便衫履無拘束
且試春城一夜風

寄季弟支山

兆岐 二首

時弟婦新亡

可憶臨歧語
俄更暑與寒
蛛絲乘月好
社雨促花殘
不讀絕交論
焉知行路難
濶疏終病爾
離夢遶江干
聞道瓶簪厄
支床想痛酸
家書徒切切
驛路自漫漫
易活庭前樹
難迴鏡裏鸞
晨昏勞檢點
有淚莫輕彈

中秋無月卽席分賦兼寄弟閩風

光帽

吐霧漫山雨漲江空勞海賈倚篷窗珠胎閉彩虛三五
雁侶驚寒見一雙響絕遠鐘魂欲斷座搜強韻興難降
不知共此陰晴夕誰與催詩倒酒缸

除夕家書至

晚鐘高曳亂雲催無計能揮日御迴花綴蠟燈終少態
香添鑪火漸成灰一緘眼底安心藥十口宵深守歲杯
只有孤飛鴻似我蒙頭風雪過南臺

春正四日謝孝廉徵雲招飲一枝山房

亞字城南烏石西市塵不到稱幽棲一聲山犬穿雲吠

幾處林鳩帶雨啼掃葉煮泉丹井暖就花移棧石牀低
平生賸有春襟在纔入新年醉似泥

春日遊林氏園

不信桃源路渺茫早春風日趁漁郎疏疏竹影穿榕影
灑灑花光界水光行度柳橋身入畫坐梳石髮手聞香
長年管領山翁健門外征車幾夕陽

奉大府檄攝鰲峯書院山長

刺桐花外雨纖纖芳徑孤尋溼帽簷如此林泉真是好
不知吏隱可容兼苔錢罷埽青常滿書帶無澆綠自添
憶到十年吟諷地松釵落盡鳥窺簾

憶讀書萬松書院
忽忽逾十載矣

同趙青軒再遊鼓山至湧泉下院撤騎步上越宿
而歸得詩四首

小雨疏烟澹曙光東郊三月放遊韁衝泥犢健分秧早
飛雪蛾輕打麥忙路轉牆腰窺藥圃鞭垂沙尾認魚莊
程程芳草風嘶遍便不登山與自長

屋枕山椒遠陌塵借他筇屐試嶙峋哥哥喚樹行來路
栩栩穿花夢裏身秋葉入春紅孕荔晴雲帶雨碧成鱗
擘窠三字靈源洞昏黑還應一問津

佩壺清興動相於況復花前淑景舒雜坐細茵忘主客
閒評殘碣歎居諸樵逢行去聲者工烹茗僧號知賓解索

書共道夜來塵夢斷一樓鐘聽五更初
相將拍手過橋灣橋畔松枝且試攀不分逾年重入寺
何妨今日暫辭山輪蹄到底依歸路猿鶴回頭認別顏
省得三身無定在豈容信宿戀桑閒

聞同年杭二堇浦世駿就聘閩闈詩以誌喜

聞說徵車入海天羈魂延佇驛樓前定知史藁餘三篋
獨占湖山已二年過嶺日低晴戴笠下灘風駛晚行船
只今面目慚猿鶴把袖何堪對鄭乎

宿昔情懷各自知飛來風馭豈前期文章聲價憑他日
山水遭逢在此時十里紅雲移日月中宵紫氣耿雄雌

相看莫漫悲離別爲我搖毫賦好詩

留別家師顏

何須述夢涕洟瀾此日樽前已少歡常爲塵勞見時少
況當秋老別君難黃花驛路青袍瘦紫蔗園林白袷寒
聞道名場方選佛好隨俗駕一彈冠

去閩前五日編修家學圃謝古梅庶常劉鄰初秋

部張雪樵大令黃莘田貢士謝徵雲諸生林興

井渭雲涪雲及家師顏辱餞於一枝山房舟中

卻寄

五載忻逢海上仙異鄉投分最相憐山梅爲我應先放

簷月窺人轉欠圓有夢儘成蕉覆鹿無心動遇酒如泉
樽前萬事從頭想好費光陰締此緣

未能日夕處閩中浪說清遊數謝公文蛤細嘗殊不惡
離支飽啖亦稱雄淚縈促席交光燭魂斷高梧一夜風
直似回頭望鄉井詎因歸路便匆匆

白水口至浦城山行偶記

徽建溪之險故陸行也

襆被匆匆歸思賒山程日日歛山家逢人更覺窮於我
得酒生憎淡過茶曉霧彌漫深隱豹晚風蕭瑟亂棲鴉
就中佳處差堪說一路香生萬樹花

皆桂也數百里不絕

九月六日度仙霞嶺回首客閩以來忽忽五易歲

矣

秋雲一片夕陽飛歸夢征魂繞翠微暖藉草茵關吏醉
閒殮松實寺僧肥芒鞋未是尋芳屐蠻布堪充冒雪衣
誰信吾無溫飽志半生曾不脫塵鞿

重九後一日抵家始知二嚴凶問哭之

同年嚴庶
常璫門人

嚴用和秀才年
皆未至三十

黃葉江頭歸夢醒山川如展舊丹青風光一見意飛動
消息頻驚淚雨零嶺海瘴深魂未接秣陵書在日重經
幾回待酌埋文冢樹樹商聲不可聽

春日飲戴鷗亭西園

頻年塵夢判衙齋一昔鄉園秉燭偕花入試燈風更好
酒過殘臘味逾佳行拚青鏡移元髮坐看金蟲墮玉釵
硯席幾人今好在參差星斗落空階

虎邱夜步

遊冶喧初寂支筇興轉賒龍湫澄夜氣佛火入春華隔
水鐘能度隨風月自斜當階索茶具烏帽冷籠紗

和壁間汪復園

臺

題野寺之作次韻

天花香夢幾慵騰吟向霜橋又雨鐙惆悵卅年行腳遍
鎮無人識是詩僧

對雪

梅梢月冷夢醒遲身似寒蟬挂蛻時輸與故園兄及弟

僕無兄適汪氏女兄未學而識字知詩蓋夙慧也 遶廊爭唱謝家詩

雪夜有作寄汪五積山

六花乘夜寂放意弄便娟巢壓高樓鳥窗驚入定禪寒
缸疑似豆遠夢散如烟何處袁高士相思獨悄然

雪夜聞隣寺鐘和虛亭

雲重寒空月半窗鏗鉉到耳便心降深排凍葉通蟲戶
高挾流風度佛幢幾卷楞伽供宴坐一叢花蘂落殘缸
豪吟頗仗詩僧力彷彿陽春入楚腔

二月十日得聞風書報公車發二旬矣

聞風於昨秋力疾南

歸

瑣闥逢閏晚

是年循閏月例會試展期三月

驪唱及花前盼到書盈尺

知行路二千春寒多入夜肺病況經年可奈凭欄客孤
吟落照邊

鄂虛亭侍讀養疾西山歸來得詩甚夥用來冊中

韻奉贈

肘後良方得異傳山行露坐鎮忘眠黃花千點有情淚
白日一龕無偈禪畧遣酒杯違藥裹要將詩料斷塵緣
雲扃岫幌依稀是費盡山陰十萬箋

送何其芬貢士下第還閩中兼寄劉行人鄰初林

上舍興井

何郎此別愴我神依然襍被歸江邨坐看良玉溷泥滓
重城雨暗烟魂魂諸公歷鹿致身早打門門開事即了

俗以時文為敲門磚不知始自何人
巫醫尚欲有恆況文事耶良可嘆也豈真雕琢傷天和

誰遣君家作詩好憶昔榕城共酒杯幾年存沒飛光催
三更燭焰邨復見嶺雲江月空徘徊人生汲汲何時止
舊事關心成舊史昏黃灞澹車馬稠畢竟歡情薄於紙
越王臺上秋風號越王臺下秋水高海濤徹夜登肥螯
蓮鬚迎涼壓新糟老狂劉翁及林叟鎮日酡顏開笑口
速宜就作詩千首撲去面上塵三斗

懷五人詠

汪五積山

惟憲 拔貢
生錢塘人

丹沙空青窞石室醉飽不如杭與秫大藥難為俗骨醫
人間自有神仙質積山先生清且逸月明風定波洄滴
拂袖高吟采菊詩韜囊不試凌雲筆憶昔追陪遊讌場
柳暗風疏霜雪密後期不待亦不訶預約昏歸戴星出
出山泉水一年年決漭關河久相失

周先生理齋

經邦 僕受業師祖
姑出也廩生錢塘人

一筆千言氣凌暴頭如山峯手飛瀑囚鎖靈怪羞剽盜
鼎鼎年華逼衰耗幼從北面學為文得其外郭非閩奧

紫竹山房詩錄
顏狂顧嬾任天真嬰兒啼粲從人導侈談富貴也不俗
僵臥烟霞亦非傲安得相逢盡此公破除機穽歸元造

李七存存

怪 辛丑進士紹興太守永城人

髯長礙冬眠日烟燭夜室愛士同心肝與人若膠漆朱

郭飽儒書龔黃足經術借問文何奇白云得父筆

尊君雨蒼

先生汝霖

徐括蒼

元肅 甲辰舉人歷孝豐太平令今分守玉環上元人

徐公之美美無度苦學陰何騁高步詩成便作大小書
龍蛇攫挈走風雨十年作宰山水縣要遣村童讀文賦
跛羊驚迫太行鞭拳木榮邀匠石顧紛紛江上採風謠

長遣斯人理牒訴

沈春瑤

甲 諸生 仁和人

架有萬卷籤囊無一文錢庫有十樣箋坐無一片氈問
君書畫近何如微笑低頭若有思白楊蕭蕭春盡時苦
心只有螻螻知更誰奠淚當風吹

送馬力本下第歸江南

名榮祖 江都人

一天風雨送春回誰爲先生進酒杯青鏡功名餘白髮
紅埃驛路又黃梅逢時花樣何難學憎命文章只費猜
聽徹將離呼滿市上林苜蓿幾時栽

和周讓谷

天度

講市臺雪望四首次元韻

絕磴雙盤萬里風，雄關如畫鎮當中。荒烟久已埋銀隧，

陳馬猶疑散玉鬚。順義獵圍孤鳥沒，籌邊哀角暮樓空。

誰言凍合河橋路，大甯城南水又東。

鑿石煎沙耗五行，肯因磽瘠漏邊城。

前明神宗朝稅使四出內監汪直橫

行遼東夫人毳幕空休甲，中使龍旗自盜兵。鑄鐵幾年垂

寶鑑，丸泥多說護神京。請看是處連雲麥，牧馬場閒息

橫征。順治初免牧場稅

澹澹長空事久陳，風雲勝氣去來頻。平沙臥玉看無外，

列戟攢峯認未真。陌上健兒多草服，花前宿將盡烏巾。

金湯萬里從來少，廟筭前期若有神。

雲外誰傳笑語和，山行渾似踏澄波。銜杯送臘歡情少，

倚劍從軍樂事多。暝色漸侵曹植馬，邊風初入郢人歌。

時平不設封侯印，紫領青袍奈爾何。

紅泉館雪後仿孟襄陽體，即用其集中詩韻。

紅泉凝暗脉，霽雪賸前山。一徑虛明裏，層樓杳靄閒。袁

安忘地僻，陶穀樂官閒。謂杭二況有探梅客，衝寒數往還。

曉日初窺牖，愁雲尚滿園。官貧差免俗，市近不聞喧。折

竹送清響，呼童插短藩。寒花生意足，相對各忘言。

移居八首和阮裴園。學浩同年次元韻，時與阮同

日移寓渠新居，即僕舊賃也。

玉河西畔鳳樓東，點檢新書倚宋公。舉燭曾無金粉隊，揮毫都在雪窗中。生涯忙似營巢燕，情緒紛如戲海鴻。我自後棲難得穩，怪君蹤跡頗雷同。

為君擁帚淨階塵，草色猶餘去後春。落拓遂拋三宿地，低徊曾住一年人。魚龍窟宅多風雨，燕雁光陰互主賓。此別未妨時見過，要合花木省前身。

菽水前期歎久乖，多君樂事一時皆。

裴園初迎養母氏並召眷屬至晴

簷度影烏偏好雨，榻尋聲樹最佳。見說茅容原菲食，只除何允未長齋。來宵彩月烘顏醉，不似從前冷浸階。鵲喜枝頭啁曉暎，連朝供具足蘭蓀。燔乾竈暖添鄉味。

浣舊衣輕褪酒痕，書畫壓肩憐僕健。童齧羅拜覺身尊，淮南鴻寶依然在一脉。從教啟後昆。

堂堂朱夏節初交，我亦匆匆學打包。鈎股貪衙終礙穴，細腰懸族不成巢。三年白墮能拚醉，九卷青囊待借鈔。未料病來雙眼暗，庭花落盡月銜梢。

莫道長安不易居，硯田無恙好耘耨。街西一曲徒為爾，國子先生豈給予乞米。魯公工作帖，逋錢孫復善讐書。隔窗轟笑憐兒女，苜蓿秋風報有儲。

聞風新補舍人得支秋俸

兼旬吟屐繞花廊，為赴南端晝景長。憶遠鄉愁便縱酒，在家禪院好焚香。燈原無盡傳何代，粉已成灰剩有坊。

僕近寓粉坊琉璃街屋後隙地彌望名下窪子解釋榮枯千萬劫夕陽疎雨送年芳

寒匏何分接芳茵冠笏巢由勝水濱差喜抽書陪禁

近敢辭布席待比隣三春花發頻催句七顆珠聯妙絕

倫裴園并示暮春感懷之作亦用移居詩韻但說文章堪報國諸公也合

避光塵

同年周石帆長發齊次風召南亦同日移寓次風

新居卽石帆所遺也

三遷只在巷西東賀召杯盤及孟公邨釀總能歡坐上
澗泉偏似採山中新巢帶雨梁閒燕舊夢衝寒雪外鴻

自是借枝非選樹門庭奧窔一般同

臨去呼童更灑塵要合齊泮座生春此中合付同心者

何處堪容噉肉人徐天池舊句門掩數弓寬似海庭延雙樹

敬如賓而今悟徹神仙府品秩千名一化身

雖然易地意無乖短榻長廊與昔皆糊壁紙收魚網賤

署門衙倩小胥佳呼隣約費三升酒戒婦寬持一日齋

如許清貧真是福未須列戟羨高階

疎櫺片片漏温暎枕畔香聞芷與蓀醉起鶯花三月老

舞來手玉一條痕石帆每聞鼓聲輒自起官經往復憐

資淺石帆自吉士改外用又自敘職復入翰林書付兒孫覺道尊祇恐烟樓

新樣好等閒撞破有來昆

蕭朱爭比二人交馥馥芳蘭初解苞話到春叢零茂葉
詩成鵝閣聳孤巢白家老婢都能讀洛下書生盡借鈔
我自幽憂成懶慢敢將禿穎鬪森梢

聲聲椽木警閒居灌手摳衣且罷鋤病廢酒杯常憶爾

貧添詩債重愁予

時予患目疾累月石帆屢以詩序見督頌復催此詩

十年竟跨

張衡賦萬卷偏慳皇甫書惟有焚香日端拜秘爲三尺

枕中儲

鄒生枚叟盛巖廊刻燭聯吟引興長

裴園莫春詩和者甚衆前輩鄒春齋

升恆鄭筠谷江張南華鵬神胡微君稚威天游及石帆次風並作

破鏡雪花清散影滿

城春草浩生香人稱通德宜名里我道親仁信有坊獨

歎同年司馬筆鎮教貧病度年芳

謂稚威

有美常思接坐茵三條路隔若河濱祇因十口難祛累
未辦千錢得買隣容色蹉跎悲杜甫生涯醅酤付劉倫
何當收拾殘書卷去與詩翁奉後塵

上元前三日張月槎前輩招集接葉亭分得寒蒸

二首

新年情思了無歡十日匡牀臥淺寒芳徑乍來春意動
晴園初試屐聲乾傳觴高會宜韶節隸事閒情讓散官
爲謝東君費料理纖鱗豪畜盡登盤

風信兼催白髮增轉令豪興劇飛騰隔年月向閒庭入
得氣蘭非浴室蒸宦路炎涼如轉轂 帝鄉時序又燒
燈座中多訪池塘句文弱憐渠病未能 聞風於昨冬得疾近猶未起

磁州道中有述

午照放荷酣香風不留隙延袤五里寬翩翩雜紅白停
輿作小憩選樹就陰僻客似魯諸生欲前且復卻殷勤
三揖讓拱立陳繫籍將就京兆試邂逅逢匠石池花本
家有欲折任所擇浸尋供數枝聊以當贈策釀和由詩
書論交在雲陌言念有美章欲報無束帛

平靖關

舊名恨
這關

拂天嵐翠聳清雄錯繡中原在望中申息纔堪倚北戶
江黃只可面南風喬松歲久無停籟絕壑宵明有斷虹
遠柝何來驚曉枕仰穿石罅上虛空

十四日早渡楊子江

徹夜江聲驚別夢五更人語促披衣潮頭欲上月初落
客袂生涼風正微待曙山如僧入定凌虛舟與鳥爭飛
等閒合被金焦笑幾度偷過不欵扉

兗州舟行書見

篷背蕭騷曙色微邨烟是處繞漁磯單鳩索莫拋雌去
雛燕殷勤傍母飛倚岸樵撐詩骨瘦穿橋波瀉酒容肥

程程風景都相似賺得行人遠故扉

過真定城

五年徵轡此重過滿目山川咽浩歌塔似有情還獨語
水如無況走頽波人閒臧穀原同盡世上風雲近若何
莫怪永安門外樹淡烟疎雨入秋多

九日同章容谷水部登陶然亭

城南細路好聯鑣纔轉村灣靜市囂亭倚秋空風四入
樹同僧老髮初彫西山翠靄垂天幕別院笙歌沸海潮
獨與黃花爲酒伴吟魂還仗故人招

題仲秀才燭亭閩遊草後

一劍防身萬慮空平生蹤跡頗相同春江花草迎人醉
瘴海風烟八句雄樹有離塵還掛網鳥無回首不驚弓
詩懷酒膽相將盡合讓時名與賈終
散朴利真綺繡場何人不識姓名香曾聞杜老稱鯨海
苦憶遺山笑女郎寶勝作花終是幻游蜂釀蜜爲誰忙
知君雅有風騷意願與冥心入混茫

盤山詩和張秀才

元禮

吾聞盧龍塞上有盤山盤蟻行人跡曲猊抉霜根寒牟
尼走月兔香水環風湍孤裊篆烟碧遞轉層梯丹修蛇
縮深穴遠鶴摩高翰雷車暮隱隱羊角朝團團雲愁穿

徑窄鳥苦呼羣難鐘聲遲度澗泉脈紆通竿迷歸僧敞
罔失洞龍蹒跚屹若擢金莖清淺酣宵溥坦若布方罫
黑白爭路攢卓哉張公子秀句儼可餐須彌付織芥丈
室羅遙巒譬彼法王輪周遭不見端我亦手腳旋直入
環中看

臘底病中有述四首

時借居內閣侍
讀柴禹壺邸舍

聲聲巷柝鼓三更欹枕無眠對短檠技到鳴驢真可笑
心關鬪蟻動成驚中年斷欲衰偏早瘦骨支寒痛漸生
已是低頭攻七發其如歲事劇崢嶸

又是重城歲暮時天容黯黯欲何爲六花待促梁園賦

一病真成東野詩

孟句旅客夜呻
吟有同禽鳥音

習靜且辭門外屐攻

愁還倩手中卮清貧況味何人共喜有王家置膝兒

時兒

子敬隨
侍在京

自別清都近四霜簪花重入少年場鬢絲自覺憎明鏡
爐火人還用古方鎮許讀書官有暇偶緣中酒病無妨
寒烏坐屋渾如我借得新巢近鳳凰

六尺藤牀坐小禪靜中翻覺思紛然無邊身事衝風鴟
一往鄉心泄突烟卽事適當逢鯉剖開封多半問鶯遷
家書不知
新寓故也輕駟花外春如海轉首風光欲隔年

中秋前一日同楊大字章容谷阮裴園遊陶然亭

擬攜尊山上以先有客在不果

掣閒遊展暫相將纔覺秋來氣候涼
葦路蕭蕭深沒馬山雲漠漠暗霑裳
官貧剩有遮塵扇詩好多便待月觴
讓與東堂吾不惜一聲橫笛起斜陽

重九後六日同人小集寓齋次容谷韻

佳節匆匆過賜饒未成良會意蕭騷
便呼浮蟻傾三雅不碍彭蜺誤二螯
就樹座翻風葉急背燈簷挂月輪高
交情煖處無人識一笑當筵落塵毛

故姬

生成傾國傲神仙別院歸來落照邊
風索舞筵侵袂急月窺歌扇到頭圓
只疑金屋原非分敢望珍珠重見憐
幾度巡檐粗了悟隔樓絃管似當年

遷客

塞雪荒雲寄病身舊時名姓重楓宸
閒逢驛使傳書札久占僧房忘主賓
山水有緣隨步換雪霜無賴滿頭新
君門萬里從來說萬里還應許問津

廢將

黃金散盡不謀家百戰身閒鬢未華
雄劍帶腥歸逝水烏雕留印臥殘花
圖麟閣迴天難上射虎山深日易斜
正有一腔無着淚秋風城郭起悲笳

酒徒

燕山木落雁聲高
馬上鴟夷帶濁醪
偏是市兒多涕淚
可憐雪片亦粗豪
曲翻天上聽非易
花入侯門閉最牢
真覺殘年無箇事
拚將身世付醪醕

戊辰燈夕獨酌偶成

天街燈火鬧良宵
病起聊斟酒一瓢
照眼燭花殊爛漫
舉頭簷月好招要
牢愁伏似春前蟄
往事多同夢裡蕉
便帶微醺呵凍管
滿池冰段也隨消

檜門約看花海淀
以他阻不赴檜門
用前韻見嘲

走筆奉答

我家西湖之清波

杭城西門名

流光瞥眼等擲梭
卅載尋芳

六橋畔一奩水鏡如新磨
瀧船雪騎催我去下臨無地
高緣坡穠春風裏落紅艷
方塘雨外擎枯荷蓬瀛路熟
我所識海水西折多盤渦
佳招不赴豈得已為懺宿業
割愛河燒筇毀屐召狙獠
大肉硬餅齊遮羅逢場且自
舞鸚鵡下筆不恥疥駱駝
拚將心神事摩揣聊與斯世
相委蛇如不可求吾計決
巢居千樹返舊窠吞花臥酒
恣所適朝朝暮暮歡如何
如君走馬看不定回頭未免
逢韓呵

送高秀才滙川之閩即題於周讓谷送高擬古詩

後

東風吹酒慘離情何忍聽他唱渭城早似越王臺下路
嶺猿啼斷兩三聲

庚午春仲同人湖上展周穆門墓用皮襲美過張

處士丹陽故居詩韻

寂寥書卷瘞紅霞酌罷春醪重嘆嗟又是東風百五日
不成邨落兩三家王孫草長空斜日處士梅寒又落花
寄語尋芳來往客莫將有限探無涯

自壩頭早發抵汭河道偶成

五更馬上寒差減六日春回氣未溫沙際月殘餘臘雪
柳邊金閃上初暎趨程默數堆堆堠展畫橫看隱隱邨
一抹頑烟眇何許邳州山色欲黃昏

大雪發汭河集

風緊雲繁昨夜天夢回如豆一燈然登車畧見飛空絮
覓路俄成種玉田躑躅馬蹄迷舊迹凌兢人影入荒烟
老夫未了勞生債如此衝寒逐少年

立春日嶧縣道中雪霽

彩勝銀幡隔鳳城新愁如草及時生雄雞喔喔醒殘夢
雌霧濛濛報曉晴濕翠遠從雲外現飢鳥多向日邊明
今年天上迎春早第一番風到客程

迎 駕湯山前期與李蝶園范端直章容谷嚴桐

封王景芳李符干王萊堂七侍御遊龍泉寺內

府郎中剛君攜酒肴在山見待

朝衫暫卸訪僧僚老樹勻排細路遙渡水茶烟看颺颺
沾衣花雨任蕭蕭園收絳實風初落磯覆青絲柳未彫
野性正便行又坐一峯高處酒人招

渾忘誰主又誰賓醉裏天懷倍率真採藥遠尋烟外客
拓窻閒倚畫中身龍歸別殿瞻 雲近水送征鞍照影

頻不是營邛留妙墨明朝都付馬頭塵

蝶園作
圖紀遊

次韻表弟周進士讓谷旅寓書懷四首卽送赴官

燕南兼廣其意

一天風露灑叢蕭那判華榮與寂寥但有成心皆愛業
從無定態是烟霄畫蛇未免多添足索米難云怕折腰
幾度集賢驚落筆可知非爾不能驍

十載辛勤讀五車當官偏喜說樵漁真成畫餅名流似
不信文人吏事疎大樹懸疣多杞梓奇香出火半璠璣
會須一騁驍騰勢碌碌從他但守閭

鳴琴利屣滿邯鄲入座誠知意未安老去遣排身不易
貧來商畧事都難澆愁貰酒逾無量觸械成詩又若干
畢竟宰官餘結習升沈還付等閒看

荒園半畝老榛菅慵上輕軒坐宴閒繫犬有書方脫手

琢蠡將賦早開顏

用曹昭東征賦語

奠營先嗜聞初辦肉共隣

嘗定不慳況是縣花園色笑謝庭酬唱向來嫻

讓谷母夫人姚

素嫺韻語弟妹皆化之

同藻川過虎坊橋呂氏園看藤花主人索詩留題

入門風掃馬頭埃吹落生香十丈臺未料茗爐於此對

焉知蜂蝶所從來衣冠半日漁樵伴坊市中央洞壑開

多謝殷勤留客意他年牢記道人回

追和癸酉除夕商寶意同年見過出示雜詩十首

奉次元韻

槐梢急景漸沈西門外風埃咫尺迷客至獨能憐老鶴

僕所居巷名

醉來相與逐醯雞禮刪賓主全真率談盡垓紘

半滑稽一事關心成夙負明朝纔和隔年題

三折波濤一線孤前身隔水兩樵夫

寶意家會稽

我如牀下

低韓愈君欲衙官位左徒楊柳鞭絲時狎獵鴛鴦歌板

未模糊

三十年前偕訪陶玉川於禾中僕醉為無腔之曲寶意摩笛或徹夜

何當更踐平

生約摹取香山會上圖

赴壑年華往更迎清樽紅燭鳳皇城平流易竊中朝祿

練事難兼大隱名北海偶來人競歎東坡再出宦粗成

相將試作巡檐步流光中動有聲

爆竹之族有名流星者北人呼為高

升

十二開門路四通金吾弛禁任西東
謹譁豪宴歸何許冷淡生涯在此中
浣舊朝衫餘淺碧賀新書帖檢殘紅
一宵公事徒為爾興趣逢君頓不同

端拜中雷重整冠但無纖玉理椒盤
流光一任堂堂去況味常如薄薄寒
燭下修書曾陋宋鑪前鍊氣未如樂

旁人莫信甘清寂書帕何曾到冷官

翻用楊時喬事

學語雙雛奮翮遲頻偕計吏及春期

兩兒公車初到

寧無天幸

憑人拾未是吾衰仗汝持黃耳書中多有淚
白頭吟外

更無詩

兒齋老妻及舍弟手札至

離懷遣盡還凝想鄧尉山前第一

枝

廢寺寒鐘送夕陽

先父母權厝湖上普渡菴

別經三度朔風涼未銜

墳土先更服況遣熏籠重惹香人說廉平差類祖

用陳萬年

傳主驚父老久為郎倘無心事慚妻子何惜圍爐醉百

觴

誰似君家蔗境甘弄孫久矣有餘含

寶意內外孫滿目猶誇余以閨房之

歡未為知我也

尋常樂事猶難倖爛漫歡場且莫談慣喫苦辛

因少僕未完婚娶為多男

小男病廢僮不受約諱稱多少深用怛心

不然我

亦鍾情者荷月擔風豈不堪

盟心松頂夢中經

僕獲交寶意在萬松嶺書院

花自常榮葉未零一

任年新人尚舊縱饒頭白眼還青奇文有客吟千遍時

人李次金在座濁酒分奴罄百餅徑欲早眠成我俗草堂東畔

帶明星

萬事回頭便隔年幾多暮雀與寒蟬番番棋局無成局

去去山泉總一泉寶意以施恩分府押運入都即日回任照眼蠻花開口

笑回頭漢月聳唵肩從教付與巴童唱先按前腔次和

篇

丁丑清明曉赴王園踏青之約遲諸公未至用勵

衣園宗萬曉起偶成詩韻題壁

行來芳徑鬧蜂衙坐愛窻虛不障紗橋曳殘紅歌欲斷

池開小海浩無涯粗將老態酬身事賸有豪情鬪物華

試喚宿醒人醒未等閒墻角落風花

卽席限城南二字同賦

林泉好處隔重城破曉初爲郭外行野水連塍三日雨

雜花銜路幾枝晴我來已落游蜂後興到還拚大白傾

見說常年容布席未妨時逐擔夫爭

一壺一曲共清酣報答春光我輩堪衣快午風綿早卸

座侵香壘燕初含出門尚有苔粘屐歸轡還逢柳挂驂

絕憶翠旂紅雨路承恩細草滿江南

九日衣園先生招集看花以病不赴明日卻寄

秋光又與去年同

昨秋此日同人作饒字韻詩僕在棘闈不及赴

其奈佳招值

病中笑口嬾開空對菊裹頭須帽不禁風黃觴醉處憑

身健野蝶寒來有夢通未料改官仍此負鍼砭平還仗

信天翁

花朝集王廷尉晉川寓園卽席分得深字

牆東芳讌易招尋筇屐閒穿幾樹陰向晚池臺憐月上

薄寒襟抱泥盃深飛書驛吏傳三捷

聞西師三將兵皆捷

放意歡

筵費一金好爲太平誇盛事漫教春色去駸駸

將回至熱河公寓途中疊南天門韻屬景垣和

萬曲東流湧玦環輪困佳氣近堪攀未成清暑宮中頌

前一月餘待行宮東禁以殘暑展圍期故也

皇子讀書於

忽自長楊獵後還地有

含靈先潤戶

潤戶用天官書語意

雲將入塞半遮山今宵合刻題

詩燭屋底安眠慢啟關

塞下柳四首之二

一例秋深落更殘獨饒春意豈無端龍鍾雙袖西風路

駐馬攀條仔細看

青璫門前一兩行飄蕭墜葉拂衣裳未妨人比秋娘老

剩粉殘膏也自香

野園招同直次諸君看園中海棠卽席奉呈二首

名花真是色傾城纔轉西廂舉眼驚四座合來狂御史

後堂兼進舊門生

在座倪汪二君皆出公門

休疑杜老難題句始覺

昌州浪得名好似待君歸約客甘番風裏不勝情

時野園自

臺山扈從初歸花開適在其時故云

密座芳筵面樹開諸天如在散花臺十分濃笑窺霜鬢

別樣紅潮暈酒杯眼亂午窗蜂作陣魂銷殘照綺成堆

平生稱意今年最不負韶光是此來

雕窠

嶄然翠削三千尺畧無豐兌顛至踈蔽虧午影恐行人

目極枯藤絡危石其上寬平望不到有鳥曰雕之所宅

古木空心洞無底卵育奇毛雜蒼赤陽崖雷電鍊星眸

暗谷冰霜搏劍翮曹騰或似嶽雲起瞥下渾如宋郊擲

朝遮欲盡狐兔羣暮掠旋空虵鳥迹恨小蒼鷹慚甚似

何物餓鳴敢仰嚇單于久矣徙牙帳無復弦驚疊雙厄

請看隊隊背窠飛去向 旌門爭獻獲

題張上舍琴溪畫卷

富春只隔一江城山水清音久繫情尺幅卷中藏世外

卅年溪畔住先生無絃本是陶家物有曲還欺郢上聲

莫便臨流誇洗耳也應容我濯塵纓

哭吳雲巖侍講

榆社殘星睽睽垂未應埋玉及芳時貧筵記送弓蛇酒

上元夕曾邀小敘

隣語疑聞旂旒詩

用桓元子語

意外歲馳忙日月

愁中淚盡哭親知孟郊病死元賓化寂寞雙楸伴退之

中秋節大霧用謝金圃寓樓其一詩韻呈同寓諸

公

濛濛吐霧細於塵病眼昏花失比隣山現化城遮去轍

天垂暝色恐行人

時與敬堂金圃廉衣分道在近

懷中明月光常在塞

上温酥味最醇不論陰晴且謀醉相看同是出關身

鄂爾楚克

蒙語險峻之貌

晚頓微雪次早晴喜而有作

三點兩點雪黑雲當頭漏斜日日落雲橫雪亂飛明朝

無計添寒衣

做裘悉已在體故也

且敲石火燒殘燭引睡寬中仗

醺醪夜半悄無人馬聲漫漫判作三尺平偏耳鳴雞催

我起太白睽睽清宵裏曉風吹蕩星影沈白毫早報東

輪升

雨中山行雜詠

暮看西北曉東南

南人占晴舊話

峯頂占晴里老諳竊向屬車

窺仗外兩行龍雀入烟嵐

晴雲未必如坡句此日山真披絮如我亦學山成酷肖

裏頭破帽曉寒初

味嶽塵高失故顏每從磅礴惜麓頑今朝磊磊明於畫

翻覺真山似假山

紫竹山房詩金
尋詩旋與馬鞍親，欵段輕駝擁褐身。一樹寒巢臨野渡，草橋粗縛也宜人。

九月十四日曉赴書房甚寒不日隨蹕回京

謹留長句

山館寒生翠壑長，更從臨別認秋光。雲開帷幙初陽薄，風落棠梨一院涼。自笑巡檐輸籜健，人呼圍坐試茶香。靈苗滿地憑誰護，合有雙童掃雪霜。

白鳥城至常山峪得斷句四首之二

飯熟吹香過馬前，風茅斜帶午餘烟。憐他縛屋小如許，只背山腰幾稜田。

汎掃晴泥輒更平，薄寒馬健轉輪輕。曹騰十里二梁路，

半聽風聲半水聲。

中道有地名三道梁

讌集之明日蔗邨復見投古體大篇再次奉酬

三光照燭周絃埏，德星宵見析木躔。太歲在申月在巳，烏衣主客如癯仙。因風乘杖颯以至，絕少騶從來闐駢。就中品秩下座貴，

劉武進年最少

勝踐合以年相先。坐兄南鄉

田不學未能免俗吾適然。

謂占楊宮允座

脫棄拘牽展情愔，結

密有似煎膠弦君詩方駕石湖序下包紫陌高青天。四海論交感存沒，祇餘落落同樽前。樽前或白或已老，珍重一昔拚流連。阿戎語頗類君語，

令子衣聞編修勸觴甚懇

玉生大

岳珠生川殷懃膝席壽尊客鶴觴接翅飛蹠躑蟹胥那

敵齒舌利鶯黃恰與枯腸便笙歌隨分足陶寫又況兩

部頻傳宣光燈吐花解送喜清和首夏爭春妍尋思動

以十年別相距豈必道里千昨從圖畫認玉貌瞿生為
蔗邨寫

真偏前時眉髮猶相鮮長年鎮對屋梁月幾度得拍洪

崖肩即今同朝三五輩謂申光祿
錢宮庶等往往分路鑣無聯矜

豪仲孺會有服曹通參以
服不至善病孫復方逋錢王廷尉以
病不至

時清官事尚率素罕覩竹所蹤前賢干楸巡巷漏鼓急

下堦握手逾纏絲歸輪馬健隨僕飽幽夢獨與身周旋

自憐老吃甚諸子矧乃來秀其勃焉大科循例以歲計

忽忽已過得半年後之視今今視昔撫時勿復驚推遷

甲申五日午醉後塗示兒輩

面頰依然在醉容兒時光景憶來濃門符織柳疑真虎

水馬騰波逐假龍五斗幾曾肩負米百年猶未手栽松

流光片片重來好為我迴戈莫下春

送徐夔州鄰哉之任名良工書臨晉
帖無不佳妙

儒術疑羣腹山謠達上京即看五馬貴猶是一書生涉

筆足天趣捫胸澹宦情中和行獻樂老秀起農畊

張總憲有堂泰開作臥遊圖歷記往迹尋於寓園

舊井更穿新泉甃石既畢命日樂泉招同人飲

以落之奉次元韻四首

聲名官職自天成閱世難忘幾蟀鷓汲古綆隨行處得

臥遊卅幅 出山泉到老來清榮叨勝踐纔中壽事見原

幅繫以詩 之會首座百 靜憶前因抵半生未免展圖還起歎此中作白傅

三十六歲 辛苦最分明

歲看除日滿題鈔似草青袍落遠郊金比光陰貧易擲

天然罨畫夢難拋秋鴻春燕風番下東主西賓路錯交

一覺北窗塵界絕始知身已際 軒庖

手翦蒿萊趁日長閉門時復獨持觴離離石很挈雲住

小小花嬌笑蝶忙呂直未營千貫築先生嘗欲築亭覆井而未果也故翻

用獨樂園事 獠奴先報一竿涼夔龍邱壑從天借何有山鄉

共水鄉

鄰樹分陰已積年搗來同看鏡中天文星莫是躔東井

狂客渾疑到酒泉調水作符方有約連筒當盞豈無緣

比屋三人皆種荷殊未得花 平生自笑跼蹐甚況復從君醉聖賢

述病有序

折指蛀足落齒皆病也製杖丸藥捉蝨則其事

也病與事相因故類記之

鉤指患在筋枝指還在骨措指因門闔折指因馬蹶杜如

晦為人粹毆下 二因咎屬人寧同自天伐天伐見莊 申年伏

雨霽所在泥滑滑退直鞭蹇眇隘巷走凹凸紛如人沓
來其奈擔夫突失勢不自覺機穽陷倉卒左支折中峯
分痛及爪髮蒙醫善續斷少差逾兩月嗟哉慎毀傷翻
成老來忽折指

受病我自知積濕轉成熟既得火爲妃牙孽此焉穴毫
毛似豐草仰喙得飽齧默想蠕蠕然痒痒不可撥寢成
聚針孔內潰膏液泄細水渾河黃淤流趵突決百藥猶
掩土飄蕩在一瞥金仙號密陀躍冶振餘烈譬若樹椽
猷伏蠹出朽節誰云不可雕華不風無切鄭箋花足也行復苗蛙足
丙年齒落二左車失撐拄去年右落一茲復一辭輔後

苗而先彫根撥其焉補包裹入篋筍涕沫非其伍餘存
不滿卅老弱奚足數吞骨或囫圇盜肉及絲縷可憐兩
牙門累汝肩辛苦平生噬乾腊晚節寶爛腐枉誦三百
篇笑殺仲山甫仲山甫云何柔茹剛則吐落齒

有客從西來一枝惠青玉頎然長過人倚壁手未觸材
大難爲用今適濟所欲十年前送四畊石從蜀來見遺無所用之今取其半以爲左助

俗名李公拐是也截將四之二覆頂取別劇鑿杓免齟齬無煩

刻鳩鵠人疑異彼相吾祇當小僕鶴行頓雙膝鷺立拳
一足頗宜上下山奚但支駮瘖生平逾杖鄉猶隨年少

躅安得葛陂龍相將不盈束製杖

候火藥已熟連蜷若雲委試探烏龍甲合有元珠美割
蜜丐隣翁和丸屬老婢搏成貫弗肉搓作梧桐子堆堆
積盤中磊磊落掌底世醫傳古方扶衰良有以不用染
鬚髮非貪換骨髓天成足秔稻春簸而已矣一枕熟黃
梁煩勞詎似爾尚有服金丹低頭禮方士丸藥

腐儒善生蝨貧婦善捉蝨謂言身之蠹為卿陳法律挑

燈索裏衣開褶遽聞叱或如亡王跳或如走慶疾或如

飽欲死或如熏不出或如蟹散子蟹散子自乾至佛書或如雉挾

匹延緣築圍長搜剔八林密染甲賽醜花女兒多以鳳仙染指血

牙快膏鑽燃臍化飛烟破殼浣几漆暢好爬搔除只苦

談柄失捉蝨

周立厓見遺手種晚菘并約晚敘次韻二首

滇南移種到青門一月西風霜滿園久別愈憐鄉味好

相逢直以故人論益州又見囊盛子杜老無憂手刈根

聞說賓筵貴希罕勝他榆社佐雞豚

勞君破曉遣園官好是先春味帶酸豪客定應慚豆粥

富兒枉自浣雕盤羹鹽有約成孤賞蘭臭無乖許共餐

為語元修好珍護淡交又度一年寒

雪中赴周立厓侍御之招在座史笠亭將之官梧

州即以敘別次立厓韻

掛簷星影忽相輝坐閱陰晴未放歸磨鏡新看天宇淨
除蟲暗想藥苗肥寒宵擊鉢常年有清景留賓此會稀
莫漫匆匆過嶺徼梅花爭及玉花飛

姚念慈自山右還京邀同夜酌卽席次韻奉酬

遠夢頻年寄雁門
竭來相對話寒溫
詩顏欲瘦先添纈
酒膽全降不滿尊
鐘度隔城霜力健
語纏離淚燭花昏
平生橐草粗料理
待與君家仔細論

歲云暮矣盧抱經學士召弓來僧芍菴蔬飯並邀

李學士廉衣汪宮允曉園同集芍菴有詩以忙
閒爲韻廉衣倚而和之人海中韻事也公榮雖

不與飲頗亦人忙我閒偶觸聲塵聊存公案

涼飈急景逐人忙道俗欣聞聚一堂
豪譙未妨餐佛粥律僧何礙引吟觴
打包南國雪霜密作偈西園更漏長
可惜衝筵無我在枉教身號醒時狂

擊鉢聲中往復還坐深魚鑰下重關
酒闌不放歸鞭疾

興到難從凍管閒信有青蓮藏關市

用太白青蓮居士詩意謂廉衣可

因玉版憶春山

謂抱經曉園

何當約作支硎社江左風流定

許攀

題錢籜石墨蘭

滿地霜何苦烝春窖自然素心憐爾我相對又經年

為汪持齋學士題 皇六子菜根圖凡六七種

五侯厨供萬籤排我輩寒藎亦有儕憶到故園風味好

秋來無數露根芟

三三兩兩出泥蟠一幅幽風送暑寒寄語腐儒休議蛤

南史竟陵王子良聞鍾岢議食車螯大怒於今青蓋識艱難

無多星瓠帶珍茄

柳州詩珍蔬折五茄豆菽菰蘆本一家

菽亦豆也南人若要好看来兼要飽都應讓與米囊花

華峰絕頂斷塵埃十丈纏絲撥不開昨夜羣仙煮麟鳳

忍拋寒玉墮空來

圖中有寸藕少與圖種不類故云

其四

春正下旬初遊補亭少宰西園因與同人集飲即

席示補亭二首

晴園背郭抱西廊洞壑天然又一鄉麕眼籬疎憑葦織

蛇蟠路細費弓量冰開暗注通池井苔淨寬留種藥場

不是此閒幽趣足肯支腰腳為春忙

轟堂笑語隔簾聞甘罰遲來飲百分豪畜體陳欺折俎

寄生孟覆張三軍

時以射覆賭酒

出岫雲漫道城陰渾欲合坐看樓角駐斜曛

長至日硯池冰開口占示兒輩

微陽回井底凍墨解池心終倚洪鑪力何嫌暮歲侵萬

紫竹山房詩集
三
籤吾事業一線共光陰寄語窺園者休爲搖落吟

迎 駕三角淀前期宿順義西郊農家同謝金圃

汪曉園 永錫 兩學士

一夕棲何擇三人衆已成鄉音消燭跋曉氣入雞聲野

曠經秋穫農閒傍古城千秋檀順路容易遇時平

破曉濃陰散傳籌過也無應時升日駕先我有風趨歛

坐參華綬超班半腐儒 故事 內廷迎駕班九卿之前 恍聞 咨好在

是日領班張公奏請 安 榮荷及泥塗 畢 上問你們好麼

初夏送吳孝廉朗林南歸卽席賦

歷落榆錢不滿裝殷勤就別意何長催程卽日看驢券

畏病前期乞藥方 朗林工醫頃服其湯飲甚效 貧宦夏來猶薦韭一

年春去始傳觴離情幸仗歡情減小謝津津說故鄉 家弟

顏卓赴補 初至在坐

申改翁明府以復職需次在部取小杜停車坐愛

楓林晚作畫索題

與髯相別又多年衫履依然似散仙幾向冰霜鍊金骨

慣看榮悴省塵緣迢遙風御無行地掩冉雲衣不去天

漫學紫微潦倒甚三生沈醉在花前

閣學倪敬堂陪 扈熱河聞擢春官侍郎寄以致

賀適題尊贈公都諫遺墨故有末句

縹緲容臺慎擇人遙傳秋塞播陽春有官輒憶羊元保

宋文帝曰每一官缺未嘗不思用元保此記君實事也美仕全歸賀季真送喜鵲

聲啼秘閣思親蟾子上羅巾君息女為吾門新婦黃門手澤應增

色每對經鋤識舊因

後九日邀姚貞菴徵君申笏山中丞金金門查儉

堂兩太守小敘得花字

銜蘆蠅賤酒容賒舊雨臨秋興轉加矮屋氣寒風在樹

深談情暖燭生花鬚眉有約何辭老仕隱差分等去家

姚二有官不赴而歸計未成贏得未衰吟興在憑君還向少年誇

送金二金門出塞和姚貞庵徵君用李翰林塞下

曲平韻三首

飲盡一杯酒深秋未覺寒雁隨行處別山入霧中看貯

月臺無燧眠沙馬不鞍時平交四海真欲醉樓蘭

年衰神愈王抖擻過河橋幕壓蘆根暖裘欺雪片驕望

雲鄉思劇譯梵旅愁消料且詩頻寄新音倍遠姚前漢書禮

樂志雅聲遠姚注姚同遙殆非也謂聲之飄揚耳

君恩容省過臣誼本忘家不見屯田戍頻年踏塞沙霜

邊無荔瘴笛裏有梅花隨分皆清賞休為獨客嗟

二月一日將至濟寧州喜晴

積晦經時暗曉空籠鞭寒透指尖風最先花信歸天上

取次烟痕入望中
兩馬漸隨塵土別
一帆時與夢魂通
何緣得仗朝霞力
染出扶桑大繭紅

道光二十年歲次庚子元孫元祿恭校



二
申

古今圖書集成
取次烟痕入望中
兩馬漸隨塵土別
一帆時與夢魂通
何緣得仗朝霞力
染出扶桑大繭紅

陳句山年譜
申乙亥

年歲次庚子元孫元祿恭校



